



Australia-i Palestine linük ka agizüktsü: PM Albanese

Ukraine Tir, Zelenskyy-i phone ajanga Ato kilonser Modi den jemb

Modi sorkar aser ECI lungjemer democracy samatsüner: NPCC

Dimapur, Luroi/August 11 (TYO): Tanü New Delhi nung Parliament House nungi Election Commission of India indang office tashi Leaders of Opposition Rahul Gandhi aser Mallikarjun Kharge nunger densema INDIA alliance parliamentarians aser lenirtemi longkak aita jajaba nung Nagaland nungi Member of Parliament (Lok Sabha), S. Supongmeren Jamir dena liasü.

Bihar nung electoral roll revision policy, Special Intensive Revision (SIR) agiba anema sashi-sashia nokdaker ta metetdaksütsü mechi iba sentong ya ayongzüka liasü.

Tanen makai iba ken o Parliament nung jembitsü takhangba agüjaka ruling sorkari jembitsü memelaba atema opposition MPs temi aitsüba nung MP S. Supongmeren jamir aser pa den külem opposition MPs tem den Nagaland Pradesh Congress Committee (NPCC)

nokdaka lir, ta NPCC sangdong ka ajanga ashi.

Ano kangasa majungba mapa ka inyakbaji sorkari tashiyim amshia aser anti-democratic yimya amshia item yimjung nung longkak aiterem apuba ya lir.

Modi sorkar aser Election Commission of India lungjemer inyakba ya Bihar nung tenokdangba makai ochi nung election agitsü tangatetba dak mapa tamajung inyakba kisung masü saka inyaksü melara, linük ajunga asoshi tebilemtsü tulu asütsü aser tematiba jenjang nung yimsüsüba menden nungi grassroots tashi India indang democracy taktepa aliba samatsütsü, ta NPCC sangdong ajangasa ashi.

Onoki ozü lenirtem den masetshie nokdaksü aser democracy-i takok mangu tashi iba tim masüba mapa anema maneni nokdaksü, ta sangdong ajanga ashi.

Manipur: Telungpur telok trok-i I-Day mokdangtsü ayongzüker

Imphal, Luroi/August 11 (Agencies): Manipur nung telungpur telok pezüi India nunger Independence Day benjongmung August 15, 2025 nü amungtsü aliba nung shilem magitsü ta sangdongogo aser state tesem anunga iba anogo anepdang 1:00 ako nungi nikongdang 6:30 ako tashi mokdangtsü ayongzüko.

Item telok ya Coordination Committee (CorCom) kübok lungjema lir aser parnoki Manipur nung nüburtem dang iba benjongmung nung madentsü saka iba anogo ya "black day" ama nisan sentüsü tanak asongtsü ayongzüka lir.

CorCom nungya nokdanga aliba telok trok - Kangleipak Communist Party (KCP), Kanglei Yawol Kanna Lup (KYKL), People's Revolutionary Party of Kangleipak (PREPAK), par Progressive faction (PREPAK-Pro), Revolutionary People's Front (RPF), aser United National Liberation Front (UNLF) lir.

CorCom indang Publicity Committee ajanga sangdong ka nung, Manipur nung mepetmesü aser azüdokshi ya India dak akhi putu tensa tia den sako

kumdaksütsü tasa aliba ajanga lir aser item tebilemtsü ya region nung sorkar inyakyim nungi tenzük, ta ashi.

Tesem ajunga shibanger aliba mapang medical care, media, tzü aser electricity supply, fire services aser tamangba yimsü dak sendakba sentongtem densema emergency services tem akhi ama melatsü, ta sangdong ajanga ashi.

Iba den bendenloksema ano telungpur telok ana, Socialist Revolutionary Party (SOREPA) aser National Revolutionary Front of Manipur (NRFM) ajanga iba anogomung nung shilem magitsü bhukuma sangdong aser kasa anogo state tesem ajunga ghonda 12 atema mokdangtsü ayongzüka liasü.

Manipur nung telungpur telok tem ya 1960s nungi tenzük aser UNLF, PLA, PREPAK, KCP, aser KYKL amala telok temi India nungi Manipur balaka razüka aotsü aser India den meloktepdang aliba jenjang nung alitsü asoshi yimjak nung sangdonga inyaker.

Iba movement ya 1949 merger agreement nung tera yanga lir, koba Meitei kin nungi züngsem aikati memulungi liasü.



Kohima, Dimapur aser Mokokchung nungi Ao Officers' Telongjem nung lenirtemi August 09, 2025 nü Kohima nung Nagaland Chief Secretary, Sentianger Imchen, IAS ajuruba mapang pa den agiba noksa ka yangi angur.

Election Commission-i ano RUPPs 476 indoktsü

Dimapur, Luroi/August 11 (TYO): Linük nung political party (National/State/RUPPs) tem Representation of the People Act 1951 indang Section 29A nung shia aliba kübok Election Commission of India nung tenüng zülüoker.

Iba Act kübok political party ka ama khen tenüng zülüokba sülen maitsü, saru memeshiba amala maongka aser tajangzük kar lir.

Registration atema guidelines nung party kati küm trok tashi tanen makai elections nung metoktepra, iba party ji registered parties indang list nungi agientsü

ta shia lir.

Electoral system mürek-müreka ayutsü asoshi Election Commission sentong nung shilem ka ama, ECI-i linük tesem ajunga nung 2019 nungi tenzüka tanen makai küm trok nung election ka nunga metoktepra Registered Unrecognized Political Parties (RUPPs) tem jangjateta indoktsü maparen inyaka arur, ta Election Commission of India indang sangdong ka ajanga ashi.

Iba inyakyim mezüng noklem nung ECI ajanga August 9, 2025 nü RUPPs 334 delisted sütsüogo anungji RUPPs 2,854 aliba nungi 2,520 akum.

Iba inyakyim noklem tanabuba nung shilem ka ama ano RUPPs 476 jangjatetogo, koba linük tesem balala nungi lir.

Tim masüba nung party kata delist mesüdaksütsü mechi States/UTs indang CEOs tem dang item RUPPs nem osang sangoktsütsü totuyuba agütsü aser iba sülen pei States/UTs indang CEOs ajanga ken o lemsateptsü party tem nem maongka agütsütsü.

CEOs indang report nung ajemdaker Election Commission of India ajanga RUPP delist asütsü atema tatembang telemtetba agütsü, ta ashi.

Advisor Mhathung-i anir HEC azüoktsü awareness agütsü



Wokha district nung yimtsü 14 awajema August 2-10, 2025 anogotem Human-Elephant Conflict (HEC) awareness sentong agiba mapang Advisor Mhathung Yanthan-i jembidang tangokba noksa nung angur.

Dimapur, Luroi/August 11 (TYO): Wokha district nung Human-Elephant Conflict (HEC) tebilemtsü tali tamajungba akumba azüoktsü asoshi mera agia Advisor, Agriculture, Government of Nagaland, Mhathung Yanthan-i anir constituency ajunga nung awareness agütsüba aser iba tebilemtsü ajemdaksüba sentong tem August 2-10, 2025 anogotem agia liasü.

HEC ajanga alu raksatsüba, ki o jen raksatsüba aser nisung takum samaba tesemtem nung nisung aser shiti tsüngta angatetepa alitsü asoshi nüngdakba indang iba sentong ajanga lemsatepa liasü. HEC nung

kasa toktepa telangzüba agütsüba melen nüburtem tashi aser scientific expertise amshia jenjang talang agi mapang talanglang asoshi asangsang temelenshi bener arutsüba nung rangloka liasü.

Iba sentong nung Dr. Rudraditya-i tongti shilem agia liasü, shiba Bengaluru nungi alimai kanga jangja meteta aliba wildlife veterinarian aser elephant ecologist lir aser India aser Africa nung iba wadang nung küm 18 dak tema tetsüng ajemoka lir.

Shiti temi alu raksatsüba nungi kumzüksü asoshi mersü amshia mera balala agiba maparen tenzükba nung pa ya kanga nüngtugu lir aser yangji

senotsü kangabo mindoker, mapang talanglang amshiteter aser tashiyim amshiba mali.

Anogo toku nung iba campaign ajanga yimtsüng 14 den Pyotchu-Lakhuti; Baghty-Sanis-Okotso lenmangtem nung Dr. Rudraditya ajanga 'chili-based deterrents yanglua amshiba yimya sayu, aluyimer aser local volunteers nem training agütsü aser nüburtem den sensaksem agia liasü.

Iba sentong yagi nüburtemi nisung aser arem shiruru tsüngta mepetmesü adoka aliba azüoktsü asoshi temelenshi tulu bener aruja tamajunglen nungi toktepa melen angatetepa külemi sunepa alitsü yimya sayu.

Nokpu & Saring yim nung angati Medical Camp agi



Dimapur, Luroi/August 11 (TYO): Dimapur Nokpu Senso Telongjem aser Nokpu Kaketshir Telongjem na longjemer Mangkolemba Sub-Division, kübok Nokpu aser Saringyim (Nokpu B) yimtsüng nung angati Medical Camp ka ayongzüka agiogo.

Iba camp ya Nagaland Medicine Dealers Association, Dimapur-i sponsor asü. Camp ayongzüka agiba nükjidingji yimtsüng nung alirtem aser talisa tientet rogotem aser kinü tanurtem, nem teyari agütsütsü asoshi liasü, shirnok aiben

medical facilities tajungtem magiteti arudar.

Ajak senteper yimtsüng anaprongla nungi iba camp nung nisung 350 shi shilem agia ajangzüko. Camp mapang doctor, nurse aser volunteer temi nüburttem nem takokba tashi teyari tajungtiba agüja liasü.

Medical Camp Convenor, Mr. Imtiniken Imchen-i, medical professional, nurse aser iba camp takok asoshi teyari agütsür ajak dang kanga pelaba lemsatepa liasü.

Kasa mapang nung Nokpu aser Saringyim (Nokpu B)

Village Councils-ia doctor tem, Dimapur Nokpu senso Telongjem aser Nokpu Kaketshir Telongjem nunger dang parnok mapa tajung asoshi kanga pelaba lemsatepogo.

Camp nung teyari agütsüba doctor tem:

Dr. M Tiala Longkumer, Retd. Director DHFW, Dr. Yartenla Jamir, Principal SFWTC cum C.M.O Chumukedima, Dr. K Limatula AO, C.M.O Peren, Dr. Rongsenmar Longkumer, Consultant District Hospital Dimapur, Dr. Kavito Zhimomi, D.P.O CD- I.

Aug 18 nü Committee on Subordinate Legislation amentsü

Dimapur, Luroi/August 11 (TYO): MLA aser Committee on Subordinate Legislation, Nagaland Legislative Assembly mendenbuba Zhaleo Rio-i,

August 18 nü 12 ako nungi tenzüka Assembly Secretariat kübok C. Chongshen Committee Room nung Committee senden ka amentsü ta metetdaksüogo.

Anungji iba dak sendakba nung committee züngsem ajak dang senden nung shilem agitsü atema mapa agütsütsü mepeshia metetdaksüogo.

TB agi shirangertem nem PMTB MBA kübok teyari agütsü



TB agi shirangertem nem PMTB MBA kübok teyari agütsüba noksa nung angur.

Dimapur, Luroi/August 11 (TYO): Pradhan Mantri TB Mukta Bharat Abhiyaan (PMTB MBA) kübok tuberculosis (TB) agi shirangertem nem August 9 nü Naga Hospital Authority Kohima (NHAK) Auditorium nung Nutritional teyari agütsüogo.

Iba sentong ya Corporate Social Responsibility (CSR) programme kübok North Eastern Development Finance Corporation Ltd. (NEDFi)-i sponsor asü aser District TB Centre, Kohima-i teyari agüja NEDFi Kohima Branch Office-i benoka inyaka liasü.

Nutritional teyari ya NEDFi Kohima Branch Branch

Manager, K. Jianthailung-i lemja liasü.

PMTB MBA dang ya Nikshay 2.0 Campaign ta-a ajar, koba 2022 küm September 9 nü India tir-i, linük kübok tesem balala nungi lenirtem, health ketdangsürtem, TB agi shirangertem aser stakeholder tem matsüngda virtually amenokja liasü. Iba sentong ya, tenla agütsürtem ajanga TB agi shirangertem nem lokti-i teyari agütsütsü nükjiding nung tenzüko. Tenla agütsürtem yagi parnok nem nutritional, vocational, mesüra diagnostic teyari agütsütsü.

Nikshay 2.0 nükjiding nung ano treatment outcomes tajungba kümdaksütsü atema

shirangertem nem talila teyari agütsütsüba, 2025 küm tashi nungbo TB tashidak samatsütsü atema India bendanga agütsür aliba nung lokti-i shilem agidaksütsüba densema lir.

Iba inyakyim ajanga, TB samatsütsü asoshi jenjang agiba nung nüburttemi tali shilem agitsü, shirangertem nutrition tajungba kümdaksütsü, lokti-i shilem agia shirangertem mesenmetui amshiba tajemba kümdaksütsü, tanga tashidak agi kongshir aliba shirangertem nem diagnostic support talila agütsütsü, TB indang nüburttem nem tangazükba tali agütsütsü aser shiranger kibongtem senotsü intokba tajemba kümdaksütsü imlar.

Dimapur nung State Handloom Expo ayonger

Dimapur, Luroi/August 11 (TYO): Nagaland Handloom & Handicrafts Development Corporation Ltd. (A Govt. of Nagaland Undertaking) Dimapur, Nagaland-i ayongzüka September 10 nungi 23 tashi Urban Haat, Dimapur nung State Handloom Expo (Hathkargha Mela) ka ayongzüko.

Expo nung shilem agitsü atema züngoksemsü asoshi application benoktsü atema tatemangbuba anogoji September 6 asütsü. Iba expo ya Office of the Development Commissioner (Handloom), Ministry of Textiles, Govt. of India, New Delhi-i sponsor asütsü.

Expo nung shilem agitsü

jangraba co-operative society tem, producer company tem, SHG tem, federation tem, apex society tem, silk weavers, Jute Artisans aser KVIC densema Handloom & Handicrafts agency temi Project Cell, NHHDC Ltd, Half Nagarjan, Dimapur nung apply sütettsü.

Apply asüba mapang expo nung shilem agitsüpur indang address, Mobile Number, Bank A/C No den IFSC code, stall tem nung sayatsü aliba osettem indang photo ka agütsütsü metetdaksüogo. Application ya office mapang agütsütsüla.

Stall ajak angati asütsü aser NHDP guidelines kübok atakzüka aliba ama Lumpsum TA/DA/asar Freight charges tem agütsütsü.

Business Advisory Committee senden ayonger

Dimapur, Luroi/August 11 (TYO): Speaker, Nagaland Legislative Assembly aser Business Advisory Committee, mendenbuba Sharingain Longkumer-i sangdong ka ajanga commitee senden August 20 nü11 ako nungi tenzüka C. Chongshen Committee Room, Assembly

Secretariat nung amentsü ta mettedaksüogo.

Senden nung 14buba Nagaland Legislative Assembly Session tenetbuba atema Provisional Programme tembanga jembishinütsü. Nagaland Legislative Assembly ya September 2 nü nungi tenzüka amentsü.



Tawa Kohima Ao Pensioner Telongjem nung ketdangpur tasen shimba sülen August 11, 2025 anogo nung parnoki mapa agizükogo. Yangi item ketdangpurtem noksa angur (abelen nungi...) Wb. Chubalepszuk, Tatong Tir, Dr. Temsu Jamir Tir, N. Wati Atsongchanger Tongti Zülur aser Wb. Imti Longchar.

Doyang merektettsü atema tanabuba shilem yakta tenzüksü

Dimapur, Luroi/August 11 (TYO): Doyang Water Reservoir nung tawa plastic jana, tanga janatem aser süng nangdena aliba dak sendakba nung Wokha Deputy Commissioner Vineet Kumar, IAS-i August 11 nü sangdong ka ajanga, tsüngsang junga akümba sülen Clean Doyang Mission tanabuba shilem takaratiba nung benoka inyaksü ta metetdaksüogo.

Iba inyakyim ya ken o dak sendaka aliba department aser agency tem den longjemer inyaksü, koba reservoir aser iba temeket nung aliba tesemtem ecological balance asüngsashitsüba dak rangloker inyaksü. Deputy Commissioner-i ashiba agi, ken o ya state sorkar jenjang nung benoktsü, aser janatem achaayangtsü aser tüzümpung kümzüka ayutsü atema khen atema dang masü saka teti asoshi jenjang agitsü atema asateptsü.

Küm shia plastics, süng aser

tanga janatem aika Doyang Reservoir nung atsüngdener aser iba ajanga tüzü mementsüba dang masü saka iba ya iba tesem temeket biodiversity aser iba tüzünokdang structural integrity atema lendong lir. Tüzü menenba ajanga ayong nung shirurutem dang lendong nung toktsür masü saka reservoir nung ango aputsü, tourism aser aluyimtsü atema metaloker alirtem libaliro nung kongshir.

DC Vineet Kumar-i, senso tajungtem aser Wokha aser temeket nung alirtem dang ayong merektetba mapang teka amteper inyaksü mepeshia metetdaksüogo. Paisa, iba mapa takok asoshi lokti-i shilem agitsü, jana kanga junga anepalua intoktsü aser agency balala tsüngda sendaktepa inyaksü koda tongtibang indang indang lemsatepa liasü.

Clean Doyang Mission ya tüzümpung aser alirongsen kümzüka aser wazüka ayutsü atema inyakyim benoka aliba nung shilem ka lir.



August 11, 2025 nü Riyadh nung Ambassador of India to Yemen, Dr. Suhel Ajaz Khan-i Presidential Leadership Council of Yemen Chairman, Rashad Al-Alimi den senden amendang tangokba noksa nung angur. Kasa noksa nung Deputy Chief of Mission, Embassy of India in Riyadh, Abu Mathen George aser First Secretary (Head of Chancery & Yemen Affairs), Rishi Tripathi nata angur.

Ukraine Tir,Zelenskyy-i phone ajanga Ato kilonser Modi den jemb

New Delhi, Luroi/August 11 (Agencies): Hombarnü Ukraine Tir, Volodymyr Zelenskyy-i, pai phone ajanga Ato kilonser Narendra Modi den mapang talangka jembio, ta metetdaksü.

PIB-ia sangdong ka ajanga, "Tanü Ato kilonser Narendra Modi-i telephone ajanga Ukraine Tir, Volodymyr Zelenskyy den sensaksemogo. Tir Zelenskyy-i Ukraine dak sendakba onüktem nung pa tebilemba lemsatep," ta metetdaksü.

"Ato kilonseri Tir Zelenskyy dang pelaba lemsatepba den külemi rara anentsü asoshi India-i maneni yimjung ken o jembitsü ajungshir ta metetdaksü. Iba dak sendakba nung India-i akokba tashi nungita yaritsü ta Ato kilonseri shiogo," ta kasa osang ajanga metetdaksü.

"Lenir anatisa India-Ukraine tsüngda tesendaktep jenjang reprangshi aser maneni lenla balala nung amalitepa inyaksü atema jembio," ta kasa osang

ajanga metetdaksü. Tesülen Zelenskyy-i X ajanga, "India Ato kilonser Narendra Modi den mapang talangka sensaksemogo. Künati linük ana tsüngda amalitepa inyakba dak sendakba onüktem nung o lemte. Ato kilonseri asen nübör pusema jembiba atema pa dang pelar," ta metetdaksü.

Ukraine Tirisa, Russia-i Ukraine nunger yimitem aser yimtsüngem amakba osang Modi nem metetdaksüogo, ta ashi.

Zelenskyy-i, "Russia nungeri asen yimitem aser yimtsüngtem amakba indang ni pa (Modi) nem metetdaksüogo, aser yashi Zaporizhzhia nung bus station ka amakba osang-a metetdaksüogo. Iba tatalokba nung nisung aika yiru. Yimtenren ken o jembiba ajanga rara anentsü atema maongka aliba mapang ka nung Russia nunger bomb agi yimitem nung kiojen amaker. Rara anentsü tebilemba sayutsü melen Russia-i maneni ambangyima

nisung tepsettsü tejangraba aliba dang sayur," ta metetdaksü.

Zelenskyy-isa, taküm September ita nung pai Ato kilonser Modi ajurutsü, ta metetdaksü.

"Asenoki yimjung atema inyakba nung India-i pusema ya tongtibang. Ukraine dak sendakba nung telemetba agiba ajakji Ukraine densema agitsüla," ta pai metetdaksü.

"September ita nung UN General Assembly aliba mapang nung küna ajurutsü bangjemogo aser linük semdangteptsü atema-a jembio," ta paisa metetdaksü.

Modi-ia X ajanga, "Tir Zelenskyy den jembio aser tawa tatalokbatem dak sendakba nung pa tangatetba angadangogo. Tekeraba nung iba rara anentsüji India taginüba lir ta ni shiogo. Iba dak sendakba nung India-i akokba tashi yaritsü, iba denji külemi Ukraine den tesendaktep tashi itshitsü atema inyaksü," ta metetdaksü.

Delhi police-i longkak aiter Opposition MP tem aika apu

New Delhi, Luroi/August 11 (Agencies): Hombarnü opposition INDIA teloktep nungi MP tem aika Parliament kima nungi longkak aita Election Commission of India (ECI) office-i aodang police-i nokdang aser Lok Sabha nung Opposition lenir, Rahul Gandhi aser Congress MP Priyanka Gandhi na densema aika apu.

Longkak aittsü atema temelaba agüja maliasü, ta police-i metetdaksü.

Bihar nung electoral roll atema Special Intensive Revision (SIR) agiba aser 2024 küm Lok Sabha election nung ochimashi liasü, ta tai

tonglokja opposition MP temi longkak ait.

Joint Commissioner of Police, New Delhi, Deepak Purohit-i, "Onoki MP tem aika pua anasa anasa aliba police station kati anir ao. Yangi longkak aittsü atema temelaba agüja maliasü, ajisüaka onok nem jelia osang metetdaksür liasü," ta metetdaksü.

MP temi Parliament kima Makar Dwar nungi apusoa ECI office-i aoba mapang nung police-i nokdang. MP tem jagi "vote auyartem" ta yimyim ayima liasü.

New Delhi Deputy Commissioner of Police

(DCP), Devesh Kumar-i, "Election Commission-i MP 30 atema dang temelaba agüja liasü. Ajisüaka parnok aika asüba agi onoki apu. ECI ajurutsü atema MP 30 nem temelaba agütsüogo ta onoki parnok nem metetdakja liasü. Onok nem kodang tenüng agütsüdir MP 30 ji ECI dangi anir aotsü," ta metetdaksü.

Congress MP Jairam Ramesh-i Hombar anüngdang 12:00 ako nung Election Commission ajurutsü atema mepishia liasü. Ajioda Election Commission sekretariat-i MP 30 dang arutsü aser tenüng jelia agütsütsü metetdakja liasü.



August 11, 2025 nü New Delhi nung Parliament kima Samajwadi Party nungi MP tem- Akhilesh Yadav, Ziar ur Rahman Barq, Awadhesh Prasad aser tangartemi election nung ochimashi anema longkak aitba noksa nung angur.

OMEN: KONG MANGKOLEMBA DISTRICT

1. Nagaland Statehood ngur taküm yagi kum 62 buba tashi terenlok wadang balala inyaka aruaka Mangkolemba Sub-Division kupok atenba tzükong asem nungi mongpu-meyiwa mapang ajak nung senzütettsü gari leman mali. Lemang makadak tesem nung ali telung tema nung akaba den nuburi züsenteba shizüka yoktsüba dak alaka rongsen sen kümdakja terenlok akatsü leman mali.
2. Tanabuba nung Asen tetsü-tubo-e wazüka toktsüba Azünglen alir tzükong asem jurila masü Ao kin yimkong senmang litsü-liküm pi bendanger Assam nunger den artsü nung onok nokdaker. Pi bendanger Assam nungerbo sorkar tashi nung asen li rakzüka par lima kümdakja par ajangzüksü terenloksü mapa inyaksü anepdang aonung shi ama arua Assam Nagaland boundary nung mangatettep aser lendongsüdong balala mapang aben ataloker. Pi bendangerbo lendong atalokba shia District competent authority nungi Administration & Security minute ishika tsüngta nung DC & SP lendong atalokba tesem tonga aruadoker, saka asenokbo District H.Q Mokokchung nungi Assam den arutsü tesem atongsü tetsüngta lemanji 90-110 KMs talang den leman makaji pi menepa arua public lendong nungi kümzüksüji tamakotsü.
3. State sokar level nung official ajurutepea jembidang pi Assam nungibo IAS, IPS rank officers DC, SP arur, Naga nungera kesa status rank DC SP tashi asürtemi jembitsüla. Pi Assam nungi DC, SP, IAS, IPS officer den Nagaland nungi officer EAC, Border Magistrate SDPO aser thana OC temi dang ajongben lendong atalokdang ajurutettsüsa asüba yagi pi bendangeri mezüngmeshir. Iyongji Assam den artsü belt nung aliba tzükongtemji District level administrative infrastructureji nüngdak ta sorkar dang akanger.
4. Nagaland State Legislative Assembly Constituency tentetdang Ao kin samanirtem, aser tsüraburtemi Ao lima Assembly Constituency 10 lemsükja-a toktsübaji maongka olura ta tenüngsang agütsür, Iba senmang ya tanü tendak Yimsüsürtemi wazüka meyuteti Constituency ka danga atsüteta bener tangai yoknungbo tarutsü putu ajak matsüngdang sentsü olura asütsü, alima aser nütsüng nübo dak malang sür merumeruer süra ajibo tai, Ao lima Disitric ano ka amenoktsübaji litsü-liküm yagi talang aser nütsüng nübo census jagia Mangkolemba Sub-Division full-fledged Disitric jenjangi ajungkettsü tetemsü
5. Ao lima tzükong 6 terok nungi tzükong aseme District jenjangi ajungketjang ta state sorkar dang akangba ya Ao kin yimkong ajangzüksü atema terenlok (Development) dak alaka tanga kecha tebilemba mali, Iba ken-o ya Ao Senden salang nung tzükong terok nungi yimsuser atenshia tatsü-talang ajak ajashia jembia yim-o langer, Tzükong teroksanger Ao sünak abener yashia, tanüa, asünga yimten sapang ka tamang yimsü mendenti ka nung dang alitsü ta zülo tashi zülutepa yur, Ao Senden-i Mangkolemba Sub-division District jenjang atema leman bushiba nung tashishi mali ta No -objection Certificate Vide letter No.AS/GEN-38/2022/1797, Dt.Mokokchung 24th January 2022 temelaba agüja-a lir.
6. Tsüngremi kanga sakloka tanü Ao Senso tajung takotet yimsüsür Member of Parliament (Lok Sabha) ka den Nagaland Legislative Assembly nung tetemjen nübo 11 lirji, item yimsüsürtem yagi iba nükla ya atalokdaksütsü ta ozü tzükong asem kanga temolung lemteta aliba mapang tawa 2nd August 2025 Mokokchung nung People's Democratic Alliance (PDA) Tsüngremmong sentong ka nung **Shri. Imkong L Imchen** Advisor Government of Nagaland, pai pa den kesa Political Party ticket, kesa manifesto amer shimtetba MLA anaji kong aliar memetet ta, Mokokchung District nung NDPP-o BJP party na azü shiranger nguteper ama ta aserbo "Mangkolemba aka-a kongsa mangko-alemba ni memetet ,Mangkolemba District kong Mangkolemba district asütsüba aji, ta kolokotema Ao lima tesadang ka pur mezüngmeshia jembibato ngua Aor Yimsüsürtem tsüngta am-alitep aser telongjem iba tashi ya dang asüno, iba den Yimsuser yagi pei nübör pi bendanger Assam asürtem alirtem timtem toudhi tia indang ya iba tashi ya-ang bilemtsür sürnung ta pi pur bendanger matsüngdang Aor yimkong maksütsüogo ta ozü Tzükong Asem sangeribo kukua aitsür. Tanü tashi nung Aor kecha nunga lemsa-a mali, aser tangar makokba kecha melika, tarutsüa Aor lemsatsüsa ozü tzükong asemsanger kecha tebilemba melika, Saka Yimsüsür iba tashi ya ang tangatetba temetetba shisatsü bener yimjak nung kolokotema pei nübör mezüngmeshi-otem yamaisa jembira, idangjiang lokti tebilemtsü toluba adoktsü ta taitzüba-o den tanü ozü tzükong asem Jangpetkong, Japukong aser Tzurangkong senso-sanger-i "**Kong Mangkolemba District ?** ta asüba oji jangjatsür.

President
Jangpetkong Senso Mungdang

President
Japukong Senso Senden

President
Tzurangkong Senso S



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 12, 2025

Sangküm Moatsü & Tsüngremmung!

Taküm 2025 küm asoshibo asenok Aor sobaliba benjong Moatsü aser Tsüngremmung na prongla süiogo. Aji oda, mejangrartem mamongyonga tejangrar aser sobaliba metetertembo tesem aika nung jangratema longsutepa mungtepba nguogo. Kasaji, Tsüngremi dang asenok nem taküm aser mapang tajung moatsüra, sangküma kasa sobaliba benjong ana ya tesem ajaklen ano telongsuba nung amongtsü bilema tang yongi sentong atongtsü nüngdaker. Aji oda, tanü asüngbo benjong amungba ya asen kija pelatepa lalushiponga amongtsüba masü saka asenok benjong nung yar tsüngsanga pelatepa amungba reprangtsü asoshi alima tesem balala nungi raliwalirtem tereprangi arur, anungji benjong mapang ya senotsü endoka amungba kisüng masü saka senotsü aaba mapang tajung ka kuma mungteter. Ibaji asenoki Kohima nung state government-i ayongzükba Hornbill benjongmung nung angur. Joko, asenoka iba Hornbill benjong ajanga Kohima nung alir aser Kohima tongtetertem lenmang balala nung ajangzükba ajizüka asen lima nunga Moatsü aser Tsüngremmung ya asenok kija dang amungba benjong ka masü saka alima ajunga nungi arua amungba 'International Cultural Festival' ka kuma among meshiogo. Iba amaji asen sobaliba benjong agi alima benjungmung tuluka kuma amungtsüba tasak masü, kechiyong sentongji tangari yanglutsü masü saka asenoki yanglutsü, anungji asenoki 'Mini Moatsü aser Tsüngremmung mongdi süra, ajia asen mulung aser Mega Moatsü aser Mega Tsüngremmung mongdi süra ajia asen mulung, itemji atema asenok tangar dang temelaba asüngdangtsü menügdaker. Atangji, asenoki asenoksasa matongtetba agi, Moatsü aser Tsüngremmung agi alimai metettsüsa benjong tulu kuma memongteti aruogo, iba jagi asenoki memeteti asenok akoksadagi. Aji oda, asenoki asenoksassa asen sobaliba benjong tuluba aser tajungba kuma amongtsü melen Hornbill benjongang tuluba kümdaktsür, Moatsü agi Mini Hornbill benjongmung kümdaktsüba bendarer sobaliba agi asen sobaliba amoksepdaktsüba mapa ka asütsü. Item ajakji bilemdanga, joko tang nungi danga sobaliba benjongbentsü tajungbo asentenshia tajungba kuma amungba ajanga asenoka shisatsü, tashitemetet aser rongsen nung ajangzüksüsa putu den apet sentong ayongzuka amungtsüba kanga nüngdaker. Anungji, iba ama Moatsü aser Tsüngremmung benjong asen Ao lima nung alima ajaki meteta amongtsüsa tang yongi Ao Sendeni mesüra Mokokchung District Planning and Development Board-i "Organising Committee" ka shima sentong yanglu nunga ajungtsü. Atangji, iba 2026 Moatsü aser Tsüngremmung benjong mejenti-bo Mokokchung town asütsü, anungji benjongti sentong anogo asem munga akatsüsa Mokokchung town nung yanglutsüa akok. Ajisüaka, Mokokchung District Moatsü aser Tsüngremmung Organising Committee-i ayongzükba benjong sentongjibo, Mokokchung town nung dang masü saka Ao lima tesem balala nung alitsü. Anungji, 2026 Moatsü benjongmung ya Mokokchung town nung aliba den külemi, tatishitsü agi, Ungma, Longsa, Longkhum, Mopungchuket, Chuchuyimlang, Tuli aser Mangkolemba ama tesemtem nunga sentong tajung yanglua amongtsü bilemtsüla. Iba benjong mapang hornbill benjong mapang ama chiyongtsü aser osettsüset tapu balala ayokba sentonga alitsü aser kentenmenü aser yartsüngsang sentong balala agi anogo tesüi memetet süitsüsa sentongtem yanglutsü. Iba amaji kodang asenoki Ao lima ajaklen anogo kasa nung benjong sentong yangludir, raliwalirtema tesem balala nungji anogo asem pezü agia jangratema monga senzütsü. Atangji, iba ama benjong sentong ayongzükter nungbo bendang limatem nungi aruba raliwalirtem dang masü saka asenok lisopurtema dena tesem balala nungji Moatsü aser Tsüngremmungja munga senzütsü. Iba ama asen sobaliba benjong agi temoatsü kuma amongtsü bilema lenirtemi tang nungi sentong yanglutsüla aser January 2026 nungibo asenok benjong sentong denji raliwalirtem asoshi tanendak hotel aser yimtsüng nung akaba kitema "homestay" kümer website ajanga alima dang sangdongtsüla. Iba jagi asenok tali pelateptsü aser tali ajangzüksü.

OLEMSABANG

Item tasüngdangba aser telangzüba nung teshisadangtsü kar ali asü ?

~ L. Kika Pongener

- Tasüngdangba : Naga nunger nujiso ya kodang tatempang telemtetba kati arutsü amai bilemer ?
- Telangzüba : Naga nunger nujiso tatempang telemtetba kati arutsü nuburtem teimla samaogo.
- Tasüngdangba : Tang asen Naga nunger nubur ajunga taginuba aser teyongyabaji kechi ka asütsü ?
- Telangzüba : Naga nunger nuburtem teyongyabaji saru-saji tapu-tapu saruba nungi nujiso aginur.
- Tasüngdangba : Naga nunger pei sasa meranga inyakertem (Entrepreneur) kechi agi rajang akümer ?
- Telangzüba : Sorkar aikati yimsu asüba yagi temelen saru (Tax) tali....Ibajagi rajang kümdaktsür.
- Tasüngdangba : Naga nunger nuburtemi Indian army aser linuk tenzüker na kobala telok tettsübuba ?
- Telangzüba : Naga nunger nuburtemi Indian army dang nungibo linuk tenzükertem-ang tettsübuba.
- Tasüngdangba : Hornbill benjong amongba yagi asen Naga lima koba lima mesuka akümtsü tsübur ?
- Telangzüba : Hornbill benjong amongba agi asen lima Sodom Gomora lima mesuka akümtsü tsübur.
- Tasüngdangba : Sobaliba benjong den Hornbill benjong külem amongba agi kechi sama-a aotsü tsübur ?
- Telangzüba : Sobaliba benjong den Hornbill külem amongba agi sobaliba benjong ya samatsü tsübur.
- Tasüngdangba : Opposition maliba sorkar-i yimsu asüba yagi linuk aser nubur ajangzüker asü akoksar ?
- Telangzüba : Opposition maliba sorkar ya yimsusur atemabo tajung, saka linuk aser nubur-bo akoksar.
- Tasüngdangba : Asen Naga lima nung lokti-tentet rongnung ochi tashiba lokti-tentetji koba telok asütsü ?
- Telangzüba : Ayaaa...Shitsü - Shingo rongnung tobur tajungtiba kobala-ang meshimtetba amai danga.
- Tasüngdangba : Asen Naga lima mejungi aliba ya yanglushitsü atema tamasa koba telok yanglushitsüla ?
- Telangzüba : Naga lima majungba ya yanglushitsü atema tamasa arogo aser mungdang yanglushitsüla.
- Tasüngdangba : Naga nunger yimden, arogo aser loktiliba ajak nung kechi agi kangasa anungakonger ?
- Telangzüba : Asen Naga nunger yimden, arogo aser loktiliba ajak nung ochi agi kanga anungakonger.
- Tasüngdangba : Alima nung mapa tapu balala inyakba nung tetoktepba alinungbo, asen Naga nungera kechi mapa nungsa tematiba jenjang nung takok (Champion) angutsü amai bilemer ?
- Telangzüba : (i) Ochimashi mapa (Corruption) inyakba nung tematiba jenjang nung takok angutsü.
(ii) Election nung pei temeden Vote sen-yong ayokba nung tematiba jenjang angutsü.
- Tasüngdangba : Asen Naga nunger lanur aikati kanga inyaknua bushiba mapaji kechi mapa ka asütsü ?
- Telangzüba : Naga nunger lanur aikati inyaknubaji....Mapaibo maotsü saka itasen-bo tulu angutsü.
- Tasüngdangba : Alima nung sorkar teimtiba aser lokti-tentet teimtiba aliba linukji koba linuk asütsü ?
- Telangzüba : Alima nung sorkar teimtiba aser lokti-tentet teimtiba aliba linukji asen Naga lima asütsü.
- Tasüngdangba : Akhidangbo sadi küli agia kibong akümer aika mali asü....Saka tanübo Sadi küli magi-i kibong akümer-ang kata mali kümogo....Ya kechiba ?
- Telangzüba : Tanübo küm aika apuani amai lir külena 'Temeshi Kiyimba' külizüng odang agütsür...!!!
- Tasüngdangba : Naga lima Khrista asoshi ta sangdongba ya Naga nunger dak apet asü mapet ama bilemer ?
- Telangzüba : Naga lima Khrista asoshi ta sangdongba ya Naga nunger dak kanga - kangasa mapet kümogo.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Chhattisgarh nung yimtsüung anati Khristantem nokdanger



Chhattisgarh nung Junwani yim süngküm anasa Khristan pastor tem aser putirtem yim telungi aittsü memelaba 'board' anasa yim council züngsemtem tangokba noksa nung angur.

August 11, 2025: Chhattisgarh state kübok Kanker district nung Hindu right wing teloktemi maneni Khristantem anema inyaker; tribal yimtsüung anatibo pastor tem aser putirtem yim telungi maitdaksütsü bangzüng renemogo.

August 5, 2025 nü Sanatan Samaj (Eternal Society)-i Bhanupratappur nung anogo piyong longkak aika Khristantem anema sorkar ketdangsertem nem temepishiba shidi ka agütsü. Longkak aitertem jagi Khristantem inyaksangshi balala ashishiba den külemi Khristantem nem yimsü temeden tagütsü, ta takhangba agütsü.

Bhanupratappur block kübok yim ana- Kudal aser Junwani na nung village council-i bangzüng renema Khristan pastor tem aser putirtem yim telungi maitdaksütsü telemtetba agi. Yim süngküm nung Khristantem dang yim telungi maittsü metetdakja 'board' ayu.

Fifth Schedule aser Panchayats (Extension to Scheduled Areas) Act, 1996 kübok ozüngtem nung ajemdaker parnoki yim

arrtsülen item board ayu. Junwani yimdak yimsü lenir, Rajendra Komra-i, "Pastor tem aser putirtemi tongmelang yimdaklirtem Khristan yimsü dangi meyiptsü ajungshir," ta metetdaksü.

Item yimtsüung nung tawa kibong 18 Khristan yimsü dangi meyipa liasü aser kibong pongubo tanaben akhi yimsü dangi meyip.

Pastor tem aser putirtemi yimdaklirtem dang nenoki Khristan yimsü dangi meyipra shisaliok, healthcare aser senotsü teyari agütsütsü ta mesüzüker, ta yimdaklirtemi tai tongloksü. Ajisüaka Khristan yimsü dangi meyipdaksüba kuli mali.

August 5 nü longkak aitba mapang nung lenirtemi Khristantem aser missionary tem nem tai tongloksü.

Municipal council Tir, Nikhil Singh Rathore-i, tamangba yimsü meyipdaksüba ya süoki ia agitsü tebilemtsü onük ka lir, anungji Hindu Society longjemtsüla, ta ashi.

Kasa sentong nungji Hindu nunger lenirtemi, Khristantemi bendanglen nungi anguba fund agi healthcare aser shisaliok services agüja Khristan yimsü

dangi meyipdaksür, ta tai tongloksü.

Tesülen Hindu nunger lenirtem jagi Khristantem anema Sub-Divisional Officer of Police nem temepishiba shidi ka agütsü. Shidi nungji parnoki takhangba aika agüja lir.

Ozüng alema asüba Tenla kitem agientsüla aser yimtsüungtem nung aliba Christian service centres anentsütsüla, ta parnoki takhangba agütsü.

Kanker nung Khristantem nem lezmükja aliba ali acre ponguji thinentsütsüla, Durg railway station nung apuba nun ana nem temerenshi agütsütsüla, Hindu nunger lanurtem anema benokka aliba ken otem agientsüla aser ozüng alema nashi shibelenertem nem temerenshi agütsütsüla, ta parnoki takhangba agütsü.

Ozüng alema aruba bendangertem meindoktsüla, love jihad anema inyaksüla aser Khristan yimsü dangi meyipertem nem reservations magütsütsüla, ta parnoki takhangba agütsü.

Parnokisa Khristantem tasü mang aremtsü atema leper magütsütsüla, ta takhangba agütsü.

Goa nung tribals nem menden lezmüktsüba Arogoi pelaa agizüker

August 11, 2025: Goa state assembly nung tribal nüburtem nem menden pezü lezmüktsütsü atema tawa Indian Parliament nung bill ka agizükba atema state nung Arogo lenirtemi pelaba lemsatepogo.

Readjustment of Representation of Scheduled Tribes in Assembly Constituencies of the State of Goa Bill 2025, ta ajaba bill ji August 5 nü Lok Sabha nung agizük. Iba bill ya Rajya Sabha nunga agizüksüsa akümtsü, iba sülen Tiri agizükba sülen ang ozüng akümtsü.

Iba bill ya kodang ozüng kümdir ibaji ajanga Goa nung

tribal nübur 149,000 tajangzük angutsü. Tribal nütsüngji teimbaka Khristantem lir.

Caritas Goa Director aser Archdiocese of Goa & Daman nung putir, Maverick Fernandes-i, "Iba ya ajanga tribal nüburtemi tribal lenirtem shimtsü atema tashi angutsü. Joko state assembly nung tribal nüburtem tebilemtsü onük benoktsü atema lenirtem alitsü," ta metetdaksü.

Goa nung akhidang nungi tribal teloktemi assembly nung tribal nüburtem nem menden lezmükjang ta takhangba agüja arur.

Taoba mapang state minister

aser United Tribals Association Alliance Tir, Prakash Velip-i, "Iba ya state atema puti otsü asütsüsa anogo ka lir. Onoki iba atema ya tesüiba küm 22 tashi takhangba agüja aruogo," ta metetdaksü.

Goa state assembly nung menden 40 lir aser tang bill tasen agizükba ajanga ano menden 4 bendenloka ajak senteperbo 44 akümtsü imlar.

Sangküm February ita nung Goa nung assembly election magidangsa iba ozüng ya mapa kuma benoktsü imlar. Goa nung tribal nütsüng 149,000 lir aser iba nungjagi teimbaka Khristantem lir.

ANOGO ABEN TSÜNGREM DEN

Tenla Agütsüba aser Tekülem

Kibuba nem sentsüwangshi Pa tenü ng dak langa agüjang: tenla ka benang, aser Pa talidaki arung.
T. Ken 96: 8.

Tanü Kibubar anogo lir. Tanaben tamangertem külemi Tsüngremer kidang sentepa temoatsü agizüktsü aser Pa nem tekülem aser tetushi agütsütsü mapang tajung moatsü.

Tekülem nung asenok shilem kaji maneni Kibuba nem tenla bener arutsübaji lir. Tsüngremer nüburtem asoshi ibai maongka aser tepela lir. Khristantemi agütsübaji tekülem nung teinyaktsü mapa (duty) ka dangbo masü. Ibai tekülem mapa nung kanga tongtibang shilem ka lir. Arogo rongsen renloktsü atema dang asenoki ter shilem aser tenla magütsür saka, Tsüngremi asenok dang aochiba tepela temaitsü Tsüngrem tekülemdaki aodang tenla bener aor. Ibai asenok ketdangsüba shilem ka lir. Tsüngremi agutsüba sempet Pa sentsüwangshi asoshi amshiba.

Makidonia Khristantemi tekülem nung 'Khristantemi koda agütsütsüla iba indang sayur:' Parnoki asen Kibuba Yisu Khrista taochi metet, aji asünung parnoki mezü ngbuba Parnok sasa Kibuba nem agütsü. Anungji asenoki Kibuba kidangi aodang Pai moatsüba yari asenoki mulungsoa aser pelaseta agütsüdi. Mulungsoa agütsübaji Tstingremer sempet ta Pauli zülü. Pa temeim agizukba ama, asenokia Pa dak alangba sentsüwangshi Pa nem agütsüdi.

BGEA-i Europe nung Khristantem nem legal teyari agütsütsü

August 11, 2025: Billy Graham Evangelistic Association (BGEA)-i Europe nung reshikangshi ajangshiba Khristantem nem legal teyari agütsütsü atema legal defense fund ka tenzükogo, ta International Christian Concern (ICC)-i metetdaksü.

BGEA Tir, Rev. Franklin Graham-i iba dangji "war chest" ta ajar.

Europe tesem balala nung reshikangshi ajangshiba Khristantemi ken o akaba mapang nung iba fund nungjagi senotsü teyari angutsü.

Interview ka nung jembidang BGEA atema legal counsel, Justin Arnot-i, "Iba tebilemtsü onük ya UK aser Europe nung lir. Ozüng kübok temeden balala agüja lir, ajisüaka item temedenji nokdanger," ta metetdaksü.

Tesempa o jembiba anema ozüngtem lir, aser itemji tim masüba nung rateta agir; iba fund ya item ama ozüngtem anema masü, ta pai metetdaksü.

2018 küm nungi 2020 tsüngda Rev. Franklin Graham-i kiyimba aser atsüapong dak sendakba nung Laishiba tesayuba indang jembiba sülen UK nung pa kanga aija liasü.

Iba mapang nungji UK nung yimti kati BGEA indang "God Loves You!" advertisement memela, iba sülen ano yimti 8 nunga item sentong memela, aser tesüsabo UK nung Rev. Graham indang evangelism sentong contract aika thinenja liasü.

UK nung aikati Rev. Franklin anema jembiba aser God Loves You tour agitsü atema yimti ka nung danga temelaba manguba sülen BGEA-i item yimtitem anema ken o benoka liasü.

Arnot-i aniba legal team-i item ken o ajak nung takok angu aser yaküm May ita nung ken o ajak tembanga liasü. Ajioda takoksa anguba atema BGEA-i temenok dollar sen million tesadang ka dak tali ngua liasü.

Temenok anguba senji kechi nung amshitsü ta bilema aliba mapang nung Rev. Franklin Graham-i Arnot dang iba senji reshikangshi ajangshiba Khristantem nem legal teyari agütsüba nung amshitsü atema "war chest" fund tenzüktsü metetdakja liasü.

Iba fund ji UK nung ken o kar nungbo amshiogo aser Europe tesem ajaklen kasa nükjidong atema amshitsü.

AO OSHI ANGAZÜKDAK:**TANÜ ANGAZÜKTSÜBA OJANG****Tesepra****(adj)** tanük masü, mesüsü (rough)

Kü tetsüing temepo kanga tesepra lir.

Teset**(n)** an aser mongnü ama dak aketba temezüing talang (talon)

* Mongnü teset agi shiruru ajepa bener aoer.

OLONG PAITEP # 7237

	1				2	3			
4			5						6
						7			
	8								
	9			10			11		
						12			13
14									
						15			

TIPIEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

-

(4)

-

(5)

-

(5)

-

(4)

-

(9)

-

(4)

-

(5)

-

(5)

-

(4)

LANGTSÜNGLEN

1. ____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. ____ kibur
13. Tebur tembar tsüngda jatepba

-

(4)

-

(6)

-

(5)

-

(5)

-

(6)

-

(5)

-

(4)

OLONG PAITEP # 7236 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsüngpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER MA

Guwahati Airport-i international architectural award 2025 nguogo.



Tanur asoba anogo nung salem osang den noksa angati adokdaksünöra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

PR benokba sülen Manipur nung telungpur 650 dak tema puogo

Imphal, Luroi/August 11 (Agencies): Manipur nung President's Rule (PR) benokba sülen telungpur telok balala nungi züngsem 650 dak tema puogo aser prangbong tapu balala 3,134 shi ngutetogo, ta ketdangsürtemi Hombarnü metetdaksü.

February 13 nü President's Rule benokba sülen Manipur Legislative Assembly ya inyaksangshi mesüi lir. Centre sorkari ano 2026 küm February 13 nü tashi Manipur nung PR benoktsü atema telemtetba agiogo, kechiyong tensa tang tashi mejungi lir, ta ketdangsürtemi ashi.

PR benoker mezüingbuba ita trok tsüngda Manipur Police, Central Armed Police Forces (CAPFs), Assam Rifles, ITBP,

aser Indian Army-i telungpur telok 25 nungi züngsem 665 shi apu aser prangbong 3,134 nguteta liasü.

Ketdangsürtemi ashiba agi, prangbong 2,035 ya lenden nung amendaker aliba telungpurtem ket nungi apu aser prangbong 1,099 tenem lima nung amendaker aliba telungpur teloktem ket nungi nguteta liasü.

Telungpur 665 apuba rongnungi UKLF (2), UKNA (5), KNF-President (4), UKRA (2), CKMA (4), ZUF (1), aser MNRF (1) amala tenem lima amendaker aliba telungpur telok nungi züngsem 19 dang liasü.

Tanungba telungpurtem ya lenden nung amendaker aliba telungpur telok; KCP-Taibanganba (27), KCP-Nganba (2), KCP-Noyon (46),

KCP-PWG (206), KCP-City Meitei (22), KCP-MC (12), KCP-Nongdrenkhomba (13), KCP-MFL (29), RPF/PLA (57), PREPAK-Pro (61), PREPAK (24), UPPK (19), PREPAK-Red Army (1), Koirang-led UNLF (15), Pambei-led UNLF (31), KYKL (38), SOREPA (10), aser NRFM (15) züngsemtem liasü.

Tenem nung amendaker aliba telungpur teloktem ya state balaka atema raradar aser kasa mapang nung lenden nung amendaker aliba teloktem ya linük balaka asoshi rara arudar.

Ketdangsürtemisa, item telungpurtem ya state kübok tesem balala nung lokti anema inyaksangshiba atema pua liasü, ta metetdaksü.

Aizawl-Silchar highway nung gari 800 dak tema yokogo

Aizawl, Luroi/August 11 (Agencies): NH-306 aser NH-06 nung lenmang raksar aliba tesem nung gari senzösenpong achaayangba Mizoram police-i Honibar aonung nungi Deobarnü anepdang 8 ako tashi nung gari 826 yokogo aser gari 36 dang anena lir, ta ketdangsürtemi ashi.

Police-i LPG cylinders bena aliba gari 25 den truck aser tanker 62 Kolasib district kübok Kawnpui tesem nungi Aizawl-i aotsü temelaba agüja liasü.

Sairang aser Khamrang tesem nungia parnoki Assam leni aoba gari 223 anepalua yoka liasü.

Aizawl nung amendaker aliba Joint Committee of the

Commercial Vehicles-i longkak aita aliba Honibarnü nikongtsütsü 4 ako nung aginba sülen garitem senzösenpontosü temelaba agüja liasü.

Iba ajanga taoba mapang nokdanga aliba lenmang ajanga gari aika aotsü temelaba agütsüogo.

State sorkari ashiba agi, Kawnpui aser Sairang na tsüngda lenmang kanga mejungi raksar aliba ya Brehostibarnü tashi nung teyanglushizüker dang liasü.

Sorkari lenmang yanglushiba indang metetdakjaka Joint Committee of Commercial Vehicles telok yagi highway nung gari tapu ajak teküzmükba kübok senzütettsüsa yanglushir

mali ta bilemer.

Parnoki lenmang yanglushiba mapang amshiba oset jenjang ashishi aser ketdangsürtem dang kilentsü junga yanglutsütsü aser lenmang nung tapok aliba ya long takang amshia ateptsütsü mepeshia metetdaksüogo.

Aizawl-Silchar highway raksar aliba ajanga Mizoram nung rongsenketzüing nung tetsükdaksü adoker lir.

Totzü den jang aser mamatzü amala tenüingdakba osettem agi anüingba ajanga nüburtem anogoshia inyakyim nung kongshio, aser kasa mapang nung kisüjensü maparenbo ajunga amai bangdaker lir.

Aug 15 nü Manipur ajunga mokdanga ayutsü telungpurtemi ayongzük

Imphal, Luroi/August 11 (Agencies): Manipur nung telungpur telok anati August 15 nü India Independence Day anogomung nung shilem magitsü atema state ajunga ghonda 12 atema mokdanga ayutsü ayongzükogo.

Socialist Revolutionary Party (SOREPA) aser National Revolutionary Front of Manipur (NRFM) nati iba tenokdanga agütsüba ajanga service timba dak kongshitsü, saka media,

medical, water supplies, fire services, tamangba yimsü sentongtem aser electricity

amala emergency service tem dak mekongshitsü, ta shioho.

SOREPA shirnok dang Socialist Revolutionary Party of Kangleipak ta-a ajar, parnoki Independence Day nü anepdang 5 ako nungi nikongtsütsü 5 ako tashi state ajunga mokdanga ayutsü ayongzükogo, aser nüburtem dang kimai matoktsü mepeshia metetdaksüogo.

Kasaji National Revolutionary Front of Manipur (NRFM)-ia kasa anogo anepdang 5 ako nungi nikongtsütsü 4 ako tashi state ajunga ghonda 11 mokdanga

ayutsü telemtetba agiba sangdongogo.

Telok anapronglai yagi 1949 küm Manipur ya India den longjemba magizüker aser iba ya ozüing alema India-i par state atsüingba lir ta shia arudar.

Parnoki nüburtem dang kilung nung dang alitsü aser Independence Day benjungmung nung shilem magitsü mepeshia metetdaksüba den, parnoki Manipur India den longjemba anemba aser Manipur nem nüjiso agütsütsü atema akhangba metetdaksüogo.

Australia-i Palestine linük ka agizüktsü: PM Albanese

Wellington, Luroi/August 11 (Agencies): Australia-i Palestine linük ka agizüktsü, ta Ato Kilonser Anthony Albanese-i Hombarnü ashi, aser France, Britain aser Canada lenirtemia kasaji shia lir.

Par cabinet telungzük aser Australia nunger aikati Palestine linük ka agizüktsü hopta aika ajungshia aruba sülen aser Gaza nung nüburtim timtemba mechi par sorkar ketdangsür temia tali aitsüba mapang ka nung pai iba o ya jembia liasü.

Anogo ishika tejakdang Israel Ato Kilonser Benjamin Netanyahu-i Gaza nung asendenshir amaktsü sentong sangdonga aliba Australia sorkari aitsüogo.

Hombarnü cabinet senden ka amenba sülen Albanese-i osangbener den jembidang, Australia-i Palestine nunger linük ka agizüktsü telemtetba agiba ya September ita United Nations General Assembly nung bentettsü, ta ashi.

Palestinian Authority nungi par tebilemba lemsatepba nung ajemdaker iba mera ya agir, ta Albanese-i ashi.

Palestinian Authority ajanga ashiba agi, Palestinian sorkar nung Hamas shilem malitsü, Gaza demilitarize

asütsü aser elections agütsü, ta pai ashi.

"Middle East nung azüdokshiba süngzü rakdanga Gaza nung rara, timtem aser yasa-tzüra tatem kati arutsü teimla tajungtibaji two-state solution ya lir," ta Albanese-i ashi.

"Gaza tensa ya alima nung tetsübo tamajungtiba alema ogo. Israel sorkari maneni international law sülen manidaker aser teyari oset, chiyongtsü aser tzü magütsüdaktsür."

Albanese-i iba sangdong magütsüdang Palestine linük ka agizüktsü merangba Australia aser danga European linüktem Netanyahu-i Deobarnü aitsü.

"European linüktem aser Australia azümongshi longpoki jaja aoba ya tezüdangtsüka aser asangsang nung taktsü lir," ta Israel leniri ashi.

Australia-i Hamas ya terrorist entity ta nüngja agüja lir aser par sorkari akhangba ama Hombarnü Albanese-ia October 7, 2023 nungi pua aliba Israel nungertem meyipa agütsütsü ashi.

Australia leniri taoba hopta Palestine nunger Tir Mahmoud Abbas den jembia liasü, shiri occupied West Bank nung

shilem kar ketdang asür, two-state solution bhukumer aser security maparen nung Israel den amalitep akar.

"Hamas senzüka yutsütsü, nok-nü agientsü aser teti asoshi region nungi aridoka Palestine nübür pei sasa yimsü asütsü ibai maongka lir," ta Albanese-i ashi. Hamas-i two-state solution maginer ta paisa ashi.

United Nations züngsem 193 aliba nungi 150 jungnüai Palestinian statehood ya agizüka lir, timba küm aika jakdang agizükba. United States aser dang Western linük temi magizüker aser Palestinian statehood ya Middle East mepetmesü tejen benteta tatembangba agreement agiba nung shilem ka asütsüla ta ashir.

Palestinian linük mulunga agizükba ya tuluba tematazütsü dang lir aser Israel aser United States-ia magizüker. Palestine nunger atema sorkar ka kumtetba nung Palestinian Authority adenba magizüktsü, ta Israel leniri ita tetenzüklen shia lir.

Two-state solution yagi Israel anasa occupied West Bank, Gaza Strip aser rakzüka aliba east Jerusalem ajunga amai meyokteper Palestine linük ka kumtettsü.

MENUNGRA BILEMTETER



Obala, A. Imlibenba Jamir (Chuchuyimlang)
06-09-1957 - 12-08-2023

Onoki teti tang meima aliba temeim kinungboi onok toktsür or küm ana ajungba anogo nung na meliaka nü tamang temeim onoki bilemteta sarasadema amonger.

~Kinungtsü, Chirnur, Kinunger aser Semchirtem.



OFFICE OF THE
WAROMUNGTSÜR TELONGJEM, KOHIMA
TENÜNGSANG AGÜTSÜR



UPSC CGS 2023 ajanga agiba tatidang nung Tsürabur Wb. Meren Longkumer aser Wt. Asangla Aier na jala, **Kr. TALISENLA LONGKUMER**, Mineral Exploration and Consultancy Limited (A Mini Ratna-I CPSE under Ministry of Mines, Govt. of India. Kübok Executive Trainee (Geology) ngutetba atema Waromungtsür Telongjem ajanga kanga pelaba den tenüngsang tulu agütsür.

Asen teyanglur Tsüngremi nü taküm aser wadang ajak asoshi maneni moajangma.

Sd/-
(Wt. Temjenmongla)
Tir, WTTK

(Wt. Imnatola)
Tongti Zulur, WTTK

Israel-i Gaza amakdang Al Jazeera osangbener pongu tepset

Gaza City, Luroi/August 11 (Agencies): Israel-i Gaza City nung al-Shifa Hospital anasa tenük yoker amakba nung osangbener tejangja Anas al-Sharif densema Al Jazeera osangbener pongu tepset.

Sharif aser ano correspondent Mohammed Qreiqeh den cameramen Ibrahim Zaher, Mohammed Noufal aser Moamen Aliwa

nunger ya mozüki indang main gate nung osangbener atema yanluba süki nung lia amak, ta Al Jazeera ajanga ashi.

"Deobarnü tenük yoker tepsetba ya press freedom dak jelia sentong yanglur amakba ano kuli ka lir," ta ashi. Committee to Protect Journalists-ia iba lendong ajanga kanga süngmanger ta shiogo.

Israel Defense Forces (IDF) ajanga Sharif dak tenük yoker amak ta jangjatsüogo aser pa ya Hamas nung terrorist cell ka indang tekolakba ama inyaka liasü ta tai tongloktsü.

Pai Israel nunger civilian aser IDF troops dak advanced rocket amshia amak aser 2019 küm iba telok indang unit ka nung liasü ta ashiba Hamas documents lir, ta ashi.

Ajisüaka Israel-i tai tongloktsüba bhukumtsü kuli magütsütet, ta CPJ ajanga ashir.

"Israel-i iba ama mapa tamajung inyakba asenoki ngua arur - iba rara nung kisüng masü, saka iba jakdang küm aika - kong Israel sepaitemi osangbener ka tepsettsü aser parnok kiralongrar ka lir ta ashitsü, saka kuli kecha magütsü ta inyaka arur," ta

CPJ indang CEO Jodie Ginsberg-i BBC dang ashi.

Sharif ya accredited journalist ka liasü aser Gaza Strip nung kechi ataloker, aji alima nem metetdaksüba "ola" liasü, ta Al Jazeera indang managing editor Mohamed Moawad-ia ashi.

Rara tepiyong Israel-i international journalists tem Gaza telungi aita osang abentsü memelar. Iba yongji outlets aikati iba territory telungzük nung aliba osangbener dak metaloka alir. "Parnok raradak atalokba indang osang bena aliba masü, parnok pei indang süki nung liasü. Gaza telung nungi osang abenba channel tem Israel sorkari ola madokdaksüner," ta Moawad-i ashi.

Arishi küm 28 tain Sharif ya asütsü mapang tatsüka lia social media X nung osang lemsateper amai liasü, kong pai Gaza City telungzük nung Israel nungeri bomb tesashi tanen makai pokloktsüba indang shia liasü.

Iba tesem amakba sülen tangokba video ana nung teburtemi yangji tepsetba nisung tasü mang bener aoba nguogo.

Nisung kari Qreiqeh tenüng aja aser media vest agir nisung kati yangji aliba tasü mang tem

rongnung ka Sharif lir ta ashi.

Iba tesem amakdang nisung tenet asü, ta Al Jazeera ajanga ashia. Mezüngbo par staff pezü tepsetogo ta sangdonga liasü, saka ghonda ishika lir nisung pongu ta jangjatsü.

Al-Shifa Hospital nung ketdangsür temi Reuters dang Hombarnü ashiba agi, kasa tesem amakba nung local freelance reporter Mohammad Al-Khaldi-a asü, anungji kasa tesem nung amakdang osangbener trok asüba akumer.

Taoba ita Al Jazeera Media Network den United Nations aser CPJ ajanga sangdong balala nung Sharif takum lendong nung lir aser pa kumzüka ayutsüla ta shia liasü.

IDF spokesperson Avichai Adraee-i July ita Sharif indang video ka X nung lemsatep aser pa Hamas indang military wing züngsem ka lir ta tai tongloktsü.

IDF ajanga tesüsa sangdong ka agütsüba nung Sharif ya osangbener ka ama sayur, saka pa Hamas den sendaktepa aliba itdangiter temi jangjatsüogo aser yangji pai terrorist training courses agiba dena lir ta ashi.

Israel mitkari 2023 küm October ita nungi Gaza amakdang osangbener 186 tepsetba tejangja lir, ta CPJ ajanga ashir.

Office of the
Chungtia Village Council
SANGDONGER

Chungtia senso masüba Mr. K. Tialiba Lkr Principal Haven of Hope Seminary, shibai Tir Yimyim adok 14th & 15th February 2025 Olemsabang nung koba pa tebilemba züluogo, ibaji Chungtia otsü masü. Anungji iba ken-o angatetteptsü atema yimdeni pa jaok, saka pai maru nung Chungtia senso shingaia pa den amalitep malitsü ta yimden ajanga sangdonger.

Sd/-
Assamwati
Council Chairman

Sd/-
Toshi Kichu
Council Secretary

GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA
NOTIFICATION

NO. DTE/ ESTT-2/02/2025-26/: Applications are invited from the class 12th passed students for the following courses of Agri & Allied and Paramedical undergraduate courses for the session 2025-26;

Sl. No.	Name of the constituent Colleges	Course	No. of seat	Eligibility criteria	Remarks
1	College of Community Science, Tura, Meghalaya	Community Science	01	40% in PCB	Female only Self-Finance
2	Assam Agriculture University, Assam	-do-	01	40% in PCB	Open Self-Finance
3	Paramedical Training Institute, Kohima	MLS	01	45% in PCB	

Total: 03

Those who had availed any State Reserved Seat are not eligible to apply. Last date for submission of application to the office of the undersigned is 14th August, 2025, till 4:00 pm. A sum of Rs. 500/- (Five hundred) only will charge as application fee.

(Er. VIPULHOU LHOUNGU)
Director

Dr T Ao Trophy: Mon aser Niuland na semi-final-i iogo



Kohima, Luroi/August 11 (TYO): Tang asaya aliba Dr T Ao Trophy 2025 - Inter District Football Championship nung Hombarnü pei tata asaya akokba sülen Mon aser Niuland na semifinal-i iogo.

Iba asayamung ya Kohima District Planning and Development Board-i host süa tang Indira Gandhi Stadium Kohima nung asayadar.

Hombarnü mezüngbuba quarter final asaya nung Mon-i goal 3-1 agi Dimapur koka liasü.

Asaya nung mezüngbuba goal ya Mon team nungi Amun

(9)-i minute 28buba nung idaktsü aser Manton (11)-i minute 73buba nung tanabuba goal idakja parnok jenjang kanga junga aküm.

Asaya nung Dimapur asoshi Imkongnungsang-i minute 78buba nung goal ka idakja timla agütsü saka minute asem dang lir Manyem (10)-i Mon atema tasembuba goal idakja parnoki asaya koka liasü.

Minister of Environment, Forests & Climate Change; & Village Guards, C L John-i, match patron ama iba asaya repranga liasü.

Tanabuba quarter final asaya nung Niuland-i goal ka agi kidanger Chümoukedima team kokogo. Asaya mezüngbuba shilem nung atakzükja aliba mapang tashi nung telok kati danga goal midaktsütetba sülen mapang apuloktsür asayaba mapang Merensang (4)-i goal ka idakja iba goal yagi Niuland team-i asaya koka liasü.

August 12 nü Quarter final

asaya:

1. Mokochung vs Peren @1pm
2. Kohima vs Wokha @4pm.

Inter-Departmental Badminton asayamung takok nung tembangogo



Kohima Deputy Commissioner Henok Buchem den Inter-Departmental Badminton asayamung nung takok angurtem tangokba noksa nung angur.

Dimapur, Luroi/August 11 (TYO): Multi-Purpose Hall, Nagaland Legislative Assembly, Kohima nung Inter-Departmental Badminton asayamung anogo ana asayaba sülen August 9 nü takok nung tembangogo. Asayamung shibangba sentong nung Kohima Deputy Commissioner Henok Buchem tetushi tejaoker liasü.

Sentong nung o jembiba mapang Buchem-i, iba asayamung 5buba takok ngua ayongzüka asayaba atema Inter-Department Badminton Club (IDBC) nem tenüngsang agütsü, koba ajanga sorkar department balala nungi badminton asayartem longjemdaktsüogo, ta ashi.

Paisa, department balala

tajungba sendaktepa inyaka nüburtem tenzüka nung arok nükjiong tongtettsü asoshi iba amala sentong ya koda tongtibang iba indang lemsatepa liasü.

Buchem shibai final asayartem repranga liasü, pai asayartemi tanüla tajung nung metoktsüi meranga asayaba atema parnok nem tenüngsang agütsü. Paisa, takokertem nem tenüngsang agüja liasü.

Asayamung shibangba sentong ya Deputy Mission Director of Samagra Shiksha aser IDBC züngsem Kelhikha Kenye lenisüba nung agi aser paisa tepela o jembiba liasü.

Ajak senteper taküm iba asayamung nung department 24-i shilem agia liasü.

Asayamung nung takok angurtem:

1. Tetsür tarep asaya: Champions - Debahuti Lahon & Angela (PAG), Runners-up - Uma Tamang & Seyiekuonuo (Police)
2. Tarep temeyoktep asaya: Champions - Uma Tamang & Lamtinmang Lhouvum (Police), Runners-up - Prathan & Alex (PAG)
3. 50+ tarep asaya: Champions - Er. Vipolhou Lhoungu & Atsuo Miachio (IDBC), Runners-up - Moses Rose & Vevosa Khamo (Treasuries)
4. Tebur tarep asaya: Champions - Kekhrie Ziephru & Sabou Yashu (IDBC), Runners-up - Muzivo Khamo & Mudozo Nyikha (Treasuries).

NPA-i Kohima Open Tournament ayonger

Dimapur, Luroi/August 11 (TYO): Nagaland Pickleball Association (NPA) aser Pickopadel na longjemer August 16 aser 17 nü Akim Sports Centre, Kohima nung Kohima Open Tournament 2025 ayongzüka asayatsü.

Iba asayamung atema ajak senteper senpet sen 50,000 agütsütsü. Asayamung nung tebur tarep asaya aser tarep temeyoktep asaya asayatsü. Nagaland ajunga nung pickleball asaya ajungkettsü atema NPA nükjiong aliba nung tang iba asayamung ayongzüka asayaba ajanga alizüng tasen ka tongtettsü.

Indian Pickleball Association aser Pickopadel na longjemer Akim Sports Center nung Kohima open tournament ayongzüka asayaba ya India nung highest pickleball court nung asayaba asütsü, kechiyong Akim Sports Center ya 4,800 altitude nung yanglua lir. Iba asayamung ayongzüka asayaba ya Nagaland aser temeket nung

iba asaya renloka aotsü asoshi kanga tongtibang jenjang ka agiba asütsü.

Iba asayamung nung state kübok tesem balala nungi Pickleball asayar tajungtemi arua shilem agütsü, aser iba ajanga asayartem parnok sempet aser tasatem sayutsü atema sabang tajung ka agütsütsü.

Iba asayamung nung shilem agütsü jangrartem dang August 14 aonung 9 ako tashi nungbo parnok tenüng züngoksemttsü metetdaktsüogo. Asayartemi official tournament poster nung QR code scan süa pei tenüng züngoksemttsü, aser iba den ano www.nagalandpickleballassociation.com. semdanga züngoksemttsü.

Association-i iba asayamung nung shilem agütsü alirtem ajaki tajungtiba asayatetsü imlaja ataba lemsatepba den Kohima Open Tournament 2025 ya skill, sportsmanship aser lokti tanüla tajung benjungba mapang ka asütsü yonga ataba metetdaktsüogo.

Cincinnati Masters: Alcaraz aser Shelton tasembuba round-i iogo

Luroi/August 11, 2025 (Agencies): Tang asaya aliba ATP-WTA Cincinnati Open nung Deobarnü tebur kija asaya nung Carlos Alcaraz-i 6-1, 2-6, 6-3 agi Damir Dzumhur koka tasembuba round-i iogo.

Spain nunger asayar ya Wimbledon final nung Jannik Sinner den asayaba sülen tang mezüngbuba iba asayamung nung asayadar. Pai mezüngbuba set ayong ayonga akok, saka tanabuba set junga masayateti pa indang service game anaben tashi break südakja asaya makok.

Ajisüaka tasembuba set nungbo pai aibelen aika memenai asaya akok.

Alcaraz shiba iba asayamung nung second seeded asayar lir, pai Monte Carlo aser Rome nung title abenba sülen iba asaya akokba densema Masters 1000 level asaya 12buba atonga kokogo.

Pa tasembuba round nung Serbia nunger asayar Hamad Medjedovic den asayatsü, shibai 6-4, 7-6 (7/3) agi Tallon Griekspoor kokogo.

America nunger asayar Ben Shelton shibai pa indang career nung taküm mezüngbuba Toronto nung Masters 1000 title ka benogo, paia Camilo Ugo Carabelli 6-3, 3-1 agi kokogo. Carabelli ya tetsüng tachichilen

temekok yiruba sülen masayatetsüsa aküm.

Argentine nunger asayar, shibai mezüngbuba round nung Kei Nishikori koka liasü, pa tanabuba set nung tasembuba game asayaba mapang temekok nung timtem adoka liasü.

Kasa asayamung nung sixth seed Alex de Minaur, shiba taoba hopta Toronto nung quarter-finalist tonga asayaogo pai America nunger asayar Reilly Opelka 7-6 (8/6), 6-4 agi kokogo.

Tebur kija asaya nung ano Australia nunger asayar Adam Walton-i taoba mapang number one asayar aser 2019 küm 2019 Cincy champion Daniil Medvedev 6-7 (0/7), 6-4, 6-1 agi kokogo.

Maneni Spain nunger asayar tejen Roberto Bautista Agut-i 6-4, 6-3 agi Cam Norrie akok aser Andrey Rublev-i America nunger asayar Learner Tien 7-6 (7/4), 6-3 agi koka liasü.

Tetsür kija asaya nung French Open champion Coco Gauff-i 6-3, 6-2 agi China tsür Wang Xinyu akok aser Jessica Pegula-i 6-4, 6-3 agi Kimberly Birrell kokogo.

Ano seventh seed Jasmine Paolini-i kanga meranga asayar 7-6 (7/2), 7-6 (7/5) agi Maria Sakkari kokogo.

BILEMDANGANG

"Lokti tebilemdangba magizükba nisung ka lenir mekümtet."